

SERMO

**SERMONS SVR LE CHAPIT. SEPTIESME de l'Epistre aux Hebreux. SERMON
PREMIER Sur Hebr. Chap. VII. vers. 1.3. — DE LA SACRIFICATVRE DE IESUS
CHRIST nostre Seigneur: OU, SERMONS SUR LES CHAPITRES VII.VIII.IX. &
partie du X. de l'Epistre aux Hebreux, PRONONCES A CHARANTON Par IEAN
MESTREZAT. A GENEVE, Pour Samuel Chouët. M. DC. LIII.**

Jean Mestrezat

Transcription électronique

[Page titre]

DE LA
SACRIFICATVRE
DE IESUS CHRIST
nostre Seigneur:
OV,
SERMONS
SUR LES CHAPITRES
VII. VIII. IX & partie du X. de
l'Epistre aux Hebreux,
PRONONCES A CHARANTON
Par
IEAN MESTREZAT.
A GENEVE,
Pour Samuel Chouët.
M. DC. LIII.

1. SERMONS

SVR LE

CHAPIT. SEPTIESME

de l'Epistre aux Hebreux.

[Page 1]

1.1. SERMON PREMIER

Sur Hebr. Chap. VII. vers. 1.3.

‘Melchisedech estoit Roy de Salem, Sacrificateur du Dieu souuerain , lequel vint au deuant d'Abraham, comme il retournoit de la deffaitte des Rois, & le benit'. ‘Auquel auſi Abraham departit la disme de tout, & premierement est interpreté Roy de Iustice: & puis auſi Roy de Salem, c'est à dire, Roy de Paix’: ‘sans pere, sans mere, sans genealogie , n'ayant commencement de iours , ne fin de vie : mais estant fait semblable au Fils de Dieu, il demeure Sacrificateur à tousiours’.

[Page 2]

LA Sapience Diuine s'est rendue admirable és escripts des Prophetes , en ce que par diuers oracles elle a predit le Christ, & representé sa personne, ses charges, & les biens qui nous en viennent, plusieurs siecles auant l'accomplissement des choses, lors que la pensee n'en pouuoit monter au cœur d'aucun homme. Car cela n'a peu estre fait que par l'Esprit Eternel, à qui les choses les plus esloignees sont presentes. Mais, outre cela, mes freres, il y a deux choses à remarquer: L'une, que ces Escritures se trouuent estre dictees par vne si haute sagesse, que les choses les plus simples couurent des mysteres, & que, bien que la superficie des paroles ait peu d'apparence, le fonds contient les merueilles de l'œuure de la Redemption , & les choses profondes du Royaume de Dieu. A raison de quoy Iesus Christ nostre Seigneur, distinguant la profondeur d'avec la superficie des passages de l'Escriture prophetique, disoit, ‘Sondez les Escritures, car elles rendent tesmoignage de moy’. Iean 5.

[Page 3]

L'autre chose est, que toutes les expressions des Escritures sont d'une si grande & parfaite verité, qu'il n'y a rien en elles, qui ne doïue auoir son accomplissement. Vn jota ou vn poinct, comme dit Iesus Christ nostre Seigneur, n'en doit passer, sans estre accompli. La chose qui n'a pas eu sa verité, ou n'en a eu qu'une ombre en la figure , doit trouuer son corps, c'est à dire, son entier accomplissement au Messie.

Ces choses , mes freres , estoient reconnues & aduoïees par les Iuifs , du temps de Iesus Christ nostre Seigneur & des Apostres. Car ils reconnoissoyent que le Messie estoit regardé par toute l'Escriture; & que tout ce qu'il y auoit eu, & de promesses , & de ceremonies,

& de grands personnages , auoyent esté comme des lignes qui aboutissoyent au Messie , ainsi qu'à leur centre. Et que les Escritures estoient d'une verité si diuine, que tout ce qui y estoit proposé, deuoit auoir vn entier accomplissement; d'où s'ensuiuoit que s'il ne l'auoit eu à certain esgard , il le deuoit auoir à vn autre.

[Page 4]

C'est sur ces fondemens que nostre Apostre dispute contre eux en cette Epistre, escriuant aux Hebreux fideles, & les munissant d'arguments des Escritures, contre leurs compatriotes qui demeuroyent incredules. Et c'est particulierement sur ces fondemens qu'il met en auant la personne de Melchisedech, comme type & figure du Messie, afin de monstrier par elle quelle deuoit estre la Sacrificature du Messie , assauoir vne sacrificature eternelle : puis qu'il estoit dit au Pseaume 110. 'Tu es Sacrificateur eternellement à la façon de Melchisedech'.

Les Iuifs estimoyent que le Messie ne deuoit point estre autrement Sacrificateur, que l'auoit esté Aarō: & croyoyent que la sacrificature d'Aaron deuoit durer à iamais , & que le Messie venant la continueroit , & y assujettiroit toutes les Nations. A l'opposite l'Apostre monstre que la Sacrificature du Christ deuoit estre de toute autre condition que celle d'Aaron, assauoir vne Sacrificature qui residast à iamais en la seule personne du Messie, sans passer à vn autre : qu'autrement il ne seroit pas Sacrificateur eternellement : nellement

[Page 5]

D'abondant vne sacrificature conjointe à vne Royauté ; Sacrificature par consequent plus excellente que celle d'Aaron , car Aaron n'estoit pas Roy & Sacrificateur tout ensemble. Et de là s'ensuiuoit que la sacrificature d'Aaron deuoit prendre fin ; veu que ce qui est moins parfait & moins excellent doit faire place à ce qui est plus excellent. Mesmes l'Apostre infere de là, que le Messie deuoit establir vn nouveau seruice, vn nouveau culte, puis que par luy deuoit estre changee la sacrificature : Pource que là où il y a changement de sacrificature il y a necessairement changement de Loy. Et particulierement l'Apostre monstre par l'Eternité de la sacrificature du Messie , son entree au Ciel, & la necessité de sa comparution deuant Dieu, afin d'exercer sa sacrificature par vne intercession continuelle: & qu'ainsi estant vrayement Sacrificateur à iamais , l'Escriture obtient la pleine verité de ses predictions.

L'Apostre donc, ayant dit, au premier verset du chapitre precedent , que

Iesus Christ auoit esté fait Sacrificateur eternellement

[Page 6]

à la façon de Melchisedech

; qui estoyët

les paroles du Pseaume 110. qu'il auoit
desia citees au chapitre 5. Il passe maintenant
à vn plein accomplissement de
cette Prophetie en ces mots:

Car ce Melchisedech estoit Roy de Salem, Sacrificateur du Dieu Souuerain; lequel vint au deuant d'Abraham, comme il retournoit de la deffaitte des Rois , & le benit , auquel aussi Abraham departit la disme de tout: & premierement est interpreté Roy de Iustice, & puis aussi Roy de Salem , c'est à dire , Roy de Paix : sans pere, sans mere, sans genealogie, n'ayant commencement de iours ne fin de vie; mais estant fait semblable au fils de Dieu , il demeure Sacrificateur eternellement
En quoy nous auons à considerer
deux poincts.

I. Quel est l'Argument de l'Apostre,
& quelle sa force, en cette particule,
Car.

II. Quelle a esté la conuenance entre
Iesus Christ & Melchisedech.

1.1.1. I. POINCT.

Cette particule, Car, est fondee en deux

[Page 7]

deux raisons: l'vne est que la Prophetie
du Pseaume 110. (où Dieu dit au Messie,
'Tu es Sacrificateur eternellement') deuoit
auoir son accomplissement. Que donc il
falloit qu'il y eust de la conuenance entre
Christ & Melchisedech, & que Iesus
Christ eust le corps de toutes les choses
dont l'ombre auoit esté en Melchisedech :
pour cela donc l'Apostre represente
ce que l'Ecriture dit de Melchisedech.

L'autre raison est, que toutes les personnes
notables auoyent eu quelque
rapport au Messie , & auoyent toutes
quelque conuenance & conformité
avec luy, & quelque esgard pour lequel
elles auoyent esté figures de ses perfections:
D'où s'ensuiuoit qu'à plus forte
raison Melchisedech, ce grand personnage ,
Roy & Sacrificateur ensemble,
dont Abraham auoit receu la benediction,
& lequel Abraham auoit honoré
de la disme de tout ce qu'il auoit, deuoit
estre par excellence type & figure de
Christ.

Ce que pour entendre, sçachez, mes
freres, que comme tout ce qui est en l'Vniuers

[Page 8]

a esté fait pour estre vn tableau
des perfections de Dieu le Createur : en
sorte que plus les creatures sont excellentes ,
plus elles ont de l'image de
Dieu. Ainsi Dieu a voulu que l'Ecriture
fust le tableau auquel fussent representees
ses vertus & ses effects au regard
de l'œuure du salut & de la redemption:
& que tout ce qu'il auoit , non seulement
de ceremonies , mais aussi de personnages
notables de l'Ancien Testament,
fust comme vne idee de ce qu'il y
auoit à considerer au Mediateur, ou Redempteur ,
soit au regard de sa personne,

soit au regard de ses effects.

Dés le commencement , vn Adam chef du monde,créé par la seule { } vertu de Dieu , formé sans œuure d'homme, & pris d'vne terre vierge & pure , non encores ouuerte par le soc & labouree de l'homme ; a esté la figure du Christ le nouuel Adam, qui est le chef d'vn monde nouveau, & a esté formé, sans œuure d'homme, de la substance d'vne Vierge par la vertu du S.Esprit : Et cet Adam pechant, & par sa desobeissance engageant en la mort toute sa posterité, a esté

[Page 9]

esté, par vn rapport de contrariété, la figure du Messie obeissant à Dieu & par son obeissance donnant la vie à sa [posterité]. Ce mesme Adam donnant estre à Eve son espouse de son costé , pendant son profond sommeil , a esté le type & la figure du Mediateur donnant estre à son Eglise par le sommeil de mort en la Croix, & par le sang & l'eau qui sortirent de son costé : tellement que vous voyez desia en Adam , le Christ & chef du monde nouveau. Et quand vous voyez Abel mourant innocemment par la main de son frere,y auez vous pas vne ombre du Christ mourant innocemment par la main des luifs ses freres selon la chair? Enoch esleué au Ciel,apres auoir vescu saintement icy bas , est la figure de ce Mediateur esleué au Ciel apres l'innocence de sa vie en la terre. Voyez-vous Noé sauuant du deluge sa famille par son arche? ç'a esté la figure de ce Mediateur qui par le bois de la Croix garantit son Eglise des tempestes de l'ire de Dieu, & qui par les eaux de son Baptesme, nous deliure de la mort, & nous mene à salut. Car, comme les

[Page 10]

eaux, qui destruisoyent & noyoyent le monde,esleuoyent l'arche en haut,& la sauuoyent;les eaux du Baptesme de nostre Noé , en destruisant le monde & le peché,donnent vie à nos ames. Voyez-vous encor Noé offrant vn sacrifice,duquel Dieu flaira vn odeur d'apaisement, & protesta d'estre appaisé enuers la terre? C'est la figure du Christ presentant vn sacrifice à Dieu en odeur de bonne senteur,sur lequel Dieu protesta d'estre appaisé enuers nous , & n'auoir plus aucune souuenance de nos pechés. Isaac né selon l'Esprit,c'est à dire,selon vne vertu surnaturelle , & non par la vertu naturelle d'Abraham & de Sara, estoit la figure de la naissance spirituelle du Messie : & luy mesme portant , au commandement de son pere, le propre bois sur lequel il deuoit estre offert & estendu , & en suite passant de mort à vie en vn moment, le glaiue de son pere

estant retenu lors qu'il auoit à donner
le coup de mort ; a-il pas esté la figure
du Christ , qui pour obeïr au commandement
de son Pere , a porté sur soy la
Croix, a esté estendu sur elle,& est passé de

[Page 11]

de la mort à la vie par sa resurrection?
Et remarquez qu'Isaac fut mené en la
contree de Morija pour y estre immolé,
qui estoit la mesme contree où Iesus
Christ a esté crucifié. Iacob luictant
avec Dieu,& emportant sa benediction,
& obtenant le nom d'Israël, a esté la figure
de ce Messie , qui en luictant contre
Dieu dans les trauaux de la Croix,
l'a vaincu,& a obtenu la benediction de
laquelle nous estions priués. Ce mesme
Iacob espousant ses deux femmes,
a figuré Iesus Christ au regard de la Synagogue,
& de l'Eglise Chrestienne,
celle-cy la bien-aimee, comme Rachel,
laquelle ayant esté sterile, finalement a
esté mere fertile , par la vocation des
Gentils. Ioseph vendu par ses freres,&
par ses souffrances esleué au gouvernement
d'Egypte,pour donner la vie à ses
freres pendant la famine, est-il pas aussi
le type de nostre Christ persecuté par
ses freres, & esleué par ses souffrances
au gouvernement du Ciel & de la terre,
pour donner vie & nourriture spirituelle
à toute sa famille ? Moysé deliurant
son peuple de l'Egypte, le passant à trauers

[Page 12]

la mer rouge,en laquelle ses ennemis
furent noyés,a-il pas esté vne figure
illustre de ce Libérateur qui a retiré son
peuple de l'Egypte spirituelle, & a noyé
ses ennemis en la mer rouge de son
sang, & qui ayant fait passer son peuple
par les eaux de son Baptesme, le nourrit
en ce desert d'vne manne celeste,& des
eaux saillantes en vie eternelle?Ce mesme
Moysé intercedant pour le peuple,se
mettant entre Dieu & eux, & demandant
d'estre fait anatheme pour eux,est-
il pas le type de ce Mediateur qui s'est
mis entre Dieu & nous , & a esté fait
malediction pour nous ? luy aussi montant
en la montagne, & donnant la loy,
a-il pas esté figure de ce Mediateur qui
estant monté au Ciel, a enseigné son
Eglise par son Esprit, & a escrit sa loy és
tables charnelles de nos cœurs? Ie laisse
icy l'agneau occis en Egypte pour la
rançon des premier-nés & dont le sang
garantissoit du glaiue de l'Ange destructeur.
Ie laisse le Rocher,duquel , vne
fois frappé , deuoyent descouler continuellement
des eaux pour abbeuuer
le peuple : lequel monstroit ce Mediateur, teur,

[Page 13]

qui vne fois frappé de la verge de
l'ire de Dieu , & par vne seule oblation,

deuoit estre à l'Israël de Dieu vne source
eternelle de vie & de consolation. Le
laisse vn Aaron expiant les pechés par
ses sacrifices & entrant avec le sang de
la victime immolee dedans le Sanctuaire
de Dieu, pour là interceder pour le
peuple. Vn Iosué, introduisant par ses
combats le peuple en Canaan, figure de
ce vray Iesus qui par ses combats introduit
son peuple en la Canaan celeste.

Vn Samson faisant ses grands exploits
par sa mort & vainquant ses ennemis en
mourant, vray type de ce Messie qui par
sa mort a destruit toute la puissance de
Satan. Vn Daud dont les persecutions,
les combats & les victoires , ont esté figures
de la condition de nostre Christ.

Vn Salomon duquel Dieu affermit le
Royaume, & qui bastit vne maison à
l'Eternel : vraye figure de ce Messie, duquel
le regne demeure à iamais, & qui a
basti vne maison à l'Eternel, assauoir son
Eglise.

Nostre Apostre donc a raison de rechercher
& poser vne conuenance entre le

[Page 14]

Christ & Melchisedech. Car vn personnage
si qualifié , que d'auoir ensemble
les deux dignités (lesquelles ne pouuoient
estre possedees par vne mesme
personne en Israël) assau.celle de Roy &
celle de Souuerain Sacrificateur , & qui
de plus eut sur Abraham la prerogatiue
de le benir, & de receuoir de luy la disme,
en tesmoignage d'honneur & de reuerence,
ne peut qu'il n'ait esté vne tres-
remarquable figure du Christ. Car si de
moindres que cettuy cy l'ont esté, il faut
que cettuy-cy le soit encor plus.

1.1.2. II. POINCT.

Or quand à cette conuenance, N'attendez
pas que nous vous disions quel a
esté ce Melchisedech, autrement que
par ce que l'Ecriture nous en propose,
assauoir qu'il a esté Roy de Salem, & Sacrificateur
du Dieu Souuerain: Car vouloir
dire son extraction & sa genealogie,
n'est pas seulement temerité, mais aussi
audace & impieté. Tout de mesme que
si on recherchoit le lieu particulier , où a
esté enseuely le corps de Moïse, & si on entre-
[Page 15]

entreprenoit à le designer : l'Ecriture [Note: Deut. 34. vers. 6.]
disant que

nul n'a connu son sepulchre
iusqu'à ce iourd'huy

. Ou, comme qui
entreprendroit de dire le iour & l'heure
du dernier iugement, duquel l'Ecriture
nous dit, que nul ne le sçait, non pas
mesmes les Anges du Ciel , ni le fils de
l'homme, assauoir entant qu'homme.
Mais ie di que c'est destruire le mystere

lequel l'Esprit de Dieu nous propose en Melchisedech. Veu que c'est ce silence de la Genealogie de Melchisedech qui sert de fondement au mystere de l'eternité de Iesus Christ , laquelle l'Apostre nous propose : car il bastit là dessus la conuenance de Christ & de Melchisedech. Si on sçavoit la genealogie de Melchisedech , l'Apostre ne pourroit pas dire qu'il est sans pere & sans mere & sans genealogie , & semblable au fils de Dieu : Il est donc du mystere & de la conuenance qui est entre Christ & Melchisedech, que cela ne se sçache pas.

Les Iuifs, qui ne reconnoissent pas ce mystere , disent que Melchisedech estoit Sem fils de Noé. Mais l'Escriture

[Page 16]

l'eust nommé, si cela eust esté, & ne luy eust pas changé son Nom. Adjoutez que les Cananeëns qui estoient de la posterité de Cham, auoyent trop d'inimitié contre Sem, que de l'auoir pris pour leur Roy. Aussi se rejette l'opinion de ceux qui ont dit que c'estoit vn Ange, car il est proposé comme Roy de Salem & Sacrificateur du Dieu Souuerain, qui ne sont pas les qualités d'un Ange, mais d'un homme. Et, quant à la ville ou territoire de Salem, dont ce Melchisedech estoit Roy : plusieurs estiment que c'est Ierusalem, laquelle soit simplement appelee Salem au Pseaume 76.

'Dieu est connu en Iudee, son renom est grand en Israël, & son tabernacle est en Salem, & son domicile en Sion'.

Salem estant à dire

Paix, & Ierusalem, on verra la paix , le mot simple pouuant estre mis pour le composé. D'autres estiment que cette Salem estoit vne ville situee au riuage du Iordain , de laquelle il est parlé en S. Iean chap.3. où il est dit que

Jean baptizoit

en Enon pres de Salim, pource qu'il y auoit là beaucoup d'eaux

:& que Salim est

escrit par vn [i] ou par vn [e] cela est indifferent, different

[Page 17]

pource que le point n'estant pas au mot Hebreu, on en donne le son par [i] ou par [e]: Et les raisons de ceux-cy sont que S. Hierosme en l'Epistre à Euagrius recite , qu'il y auoit de son temps aupres de { } Scytopolis, vne ville laquelle on appelloit encores Salem , & qu'on y monstroit les ruines du Palais de Melchisedech , par la grandeur desquelles on pouuoit iuger de la magnificence de l'ouurage. Secondement, ils alleguent que Ierusalem estoit enuironnee de montagnes: Or qu'il est parlé Gen 14. du champ de la plaine , où se fit cette rencontre : d'où ils inferent que ce ne fut pas autour de Ierusalem. Mais ce debat nous est indifferent. Il

nous suffit que Salem estoit vne ville
ou vn territoire en Canaan ; dont ce
Melchisedech estoit veritablement
Roy.Ce qui appert de ce que Melchisedech
apporta des viures pour le rafraichissement
des troupes d'Abraham
comme il est recité que les gens d'Abraham
mangerent:Gen.14.

Or vous pourriez vous estonner, que
lors en vne contree idolatre, il y eust vn
[Page 18]

Roy seruant au vray Dieu, & de plus vn
Roy, Sacrificateur du Dieu Souuerain: le
vray Dieu estant ainsi nommé à la difference
des faux dieux. Car la corruption
de ce siecle-là se peut reconnoistre par
la famille d'Abraham, dont le pere & le
grand pere estoyent idolatres. Sur quoy
nous disons premierement , que Dieu,
parmy les nations les plus idolatres &
corrompues, a suscité des personnes qui
le seruissent & le craignissent, afin qu'ils
fussent comme des estoilles esclairantes
au milieu des tenebres. Tel a esté vn
Iob entre les Orientaux: tel en Madian
vn Iethro beau-pere de Moÿse , qui
monstre par diuers effects de sa pieté
qu'il seruoit le vray Dieu. Tel aussi estoit
ce Melchisedech : Car Dieu n'a point
voulu se laisser sans tesmoignage au milieu
de l'infidelité du monde. Secondement ,
il faut remarquer qu'encor que
Dieu eust traité alliance avec le peuple
d'Israël, & eust resserré sa connoissance
à la famille d'Abraham , auant cette restriction
sa connoissance estoit indefiniment
entre les descendans de Noé , selon
que l'election de Dieu se rencontroit. troit.

[Page 19]

Et quant à la qualité de Sacrificateur,
vous auez à remarquer trois choses:
L'vne, que ce n'a esté que depuis la
loy de Moÿse qu'il n'a esté permis de
sacrifier qu'à certaine famille , assavoir
à celle de Leui , & en certain lieu , assavoir
au Tabernacle : Auant cela il n'y
auoit point de restriction ; tout chef de
famille estant Sacrificateur en sa maison.
Cela se voit en Noé , en Iob, en
Abraham, Isaac, & Iacob. La seconde est,
que ce n'a esté que par la loy de Moÿse,
que la dignité Sacerdotale a esté separee
de la Royauté; & partant qu'auant l'ordre
donné par la loy , il n'y auoit rien
d'incompatible en ces deux qualités.
Aussi entre quelques anciens peuples, les
Rois estoyent les Sacrificateurs, comme
entre les Spartins ; de quoy nous parlerons
en son lieu : Mais il faut en Melchisedech
reconnoistre quelque Sacrificature
extraordinaire , par laquelle
Melchisedech eust quelque prerogatiue
sur Abraham. Car puis qu'auant la loy
chaque chef de famille estoit Sacrificateur ,

& qu'Abraham l'estoit par consequent , comment est-ce que Melchisedech est appelé Sacrificateur

[Page 20]

a l'esgard d'Abraham? Et comment Abraham a-il peu receuoir sa benediction, & luy donner la disme ? Nous respondons donques deux choses. Premièrement, qu'Abraham n'estoit qu'un Sacrificateur domestique & priuè, comme chaque chef de famille l'estoit en sa famille : mais que Melchisedech estoit Sacrificateur public, estant Sacrificateur comme Roy sur toute vne contree. Secondement, qu'il y auoit quelque vocatiõ & autorité extraordinaire en Melchisedech, qu'Abraham reconnoissoit.

Mais venons à la conuenance qui estoit entre Christ & Melchisedech. Il y a conuenance en plusieurs chefs , assau. premierement au nom de Melchisedech: *Melchisedech* estant vn mot Hebreu, qui signifie Roy de Iustice: 2. Au titre de 'Roy de Salem', c'est à dire, Roy de paix. 3. En la qualité de Roy & Sacrificateur tout ensemble. 4. En ce qu'il benit Abraham. 5. En ce qu'il receut la disme d'Abraham. 6. En ce qu'il estoit sans pere & sans mere, sans genealogie, sans commencement de vie , & sans fin de iours. De tous lesquels chefs ce dernier semble le plus important, comme aussi

[Page 21]

aussi il est le plus difficile. Je di plus important, pource que l'Escriture par tout où elle parle de Christ & de Melchisedech, a déterminé la conuenance de l'un avec l'autre, 'en l'eternité de la sacrificature': Car remarquons premierement qu'elle n'a pas dit simplement, Tu es Sacrificateur à la façon de Melchisedech, mais, tu es Sacrificateur eternellement à la façon de Melchisedech. Secondement, nostre Apostre dit ['cettui-cy estant fait semblable au Fils de Dieu, demeure Sacrificateur à tousiours'.] Item ['Vn autre à la façon de Melchisedech est mis en auant , lequel n'a point esté fait Sacrificateur selon la loy du commandement charnel , mais selon la puissance de la vie non perissable'.] Item, 'quant aux Sacrificateurs, assauoir de Leui, il en a esté fait plusieurs, pource que la mort les empeschoit de durer, mais cettui-cy, pource qu'il demeure eternellement a une sacrificature'.

Vous voyez donc que la façon dont Melchisedech a esté Sacrificateur est constituee en l'eternité ou perpetuité. Or remarquez cela , en passant, contre l'Eglise Romaine , qui pretend que la conuenance de Melchisedech & de

[Page 22]

Christ consistoit en la chose que Melchisedech auoit accoustumé de sacrifier, assauoir pain & vin. Car l'Escriture ne nous dit point quelle matiere & espece de choses Melchisedech sacrifioit. Ce qui montre que la conuenance de Iesus Christ & de Melchisedech ne consistoit point en cela. Puis donc que l'eternité est la principale & essentielle

conuenance entre Christ & Melchisedech ,
c'est d'elle que nous parlerons la
premiere, & reseruerons les autres pour
vne autre action.

Pour cet effect d'entree remarquez
que l'Apostre dit que Melchisedech 'a esté fait semblable au Fils de Dieu' : au lieu
que Melchisedech ayant precedé , il
semble qu'il deuoit dire , que Iesus
Christ a esté fait semblable à Melchisedech.
'Cettui-cy, dit-il, estant fait semblable au Fils de Dieu, demeure Sacrificateur à tousiours'. Mais l'Apostre a ainsi
parlé
pour deux raisons: L'vne, qu'encor que
Iesus Christ, quant au temps de son exhibition,
ait esté postérieur aux ombres
& figures; neantmoins quant à l'idee de
l'entendement diuin, Iesus Christ les a precedé:

[Page 23]

precedé : & c'est sur luy que ces figures
ont esté formées , & non luy sur elles;
Et pourtant, à parler proprement, Melchisedech
a esté fait semblable au Fils
de Dieu, & non le Fils de Dieu à Melchisedech:
Car la copie est faite semblable
à l'original , & non l'original à la
copie : la personne n'est pas faite semblable
à son tableau, mais son tableau est
fait semblable à elle. Comme donc
Moïse fit le Tabernacle selon le patron
que Dieu luy en monstra en la montagne :
Aussi la verité des choses de l'Euangile
& de l'estat de Christ, a esté l'idee
selon laquelle Dieu a donné & formé
de temps en temps des figures. Ainsi
Dieu voulant que son Fils fust vn iour
offert en sacrifice , pour arrester par son
sang le glaïue de sa vengeance , institua
sur ce modele qu'un agneau fust occis,
qui par son sang preserua du glaïue de
l'Ange destructeur. Et pource que Iesus
Christ deuoit estre pris d'entre ses freres
pour estre Sacrificateur , Dieu ordonna
en sa loy, que le Sacrificateur fust
pris d'entre ses freres. De mesme la
Prouidence Diuine a adressé les combats

[Page 24]

d'un Daud, & les victoires d'un
Iosué , selon l'idee de son Christ , formant
ces ombres selon le corps, & ces
figures selon l'image viue des choses.

L'autre raison pour laquelle l'Apostre
dit , que Melchisedech a esté fait
semblable au Fils de Dieu , & non le
Fils de Dieu semblable à Melchisedech,
est, que s'agissant icy d'une eternité; la
vraye eternité ne peut pas estre faite;
car si elle estoit faite , elle ne seroit pas
eternité, puis qu'elle auroit commencé:
mais vne apparence d'eternité peut
bien estre faite. Comme ainsi soit donc
que le Fils de Dieu ait eu la vraye eternité,
c'est à dire, ait esté de tout temps;
l'Apostre n'a peu dire que le Fils de
Dieu ait esté fait semblable à Melchisedech,
mais bien que Melchisedech a

esté fait semblable à luy : car Melchisedech
 n'a peu auoir qu'une apparence
 d'éternité : (afin que vous remarquiez
 combien l'Escriture est exacte en ses expressions.)
 Et par cecy nous tenons desia
 quelque chose de ce que nous cerchons.
 Car c'est beaucoup, si nous posons cecy,
 comme en effect l'Apostre le pose, assauoir uoir

[Page 25]

que l'éternité de Melchisedech n'a
 pas esté vne vraye éternité , mais vne
 éternité faite, & par consequent vne
 éternité non éternité ; mais vne petite
 ombre d'une vérité qui est ailleurs. Cecy,
 di-ie, est beaucoup, pource qu'il nous
 sera assez aisé de trouuer en Melchisedech
 vne éternité en ombre seulement
 & apparence. Et si nous nous contentons
 de cela , nous ne trouuerons pas
 estrange qu'un homme, qui en effect aura
 eu pere & mere, commencement de
 vie, & fin de iours (comme nous ne
 doutons point que Melchisedech ait eu)
 paroisse neantmoins comme s'il ne l'auoit
 pas eu. Or nous pouuons encor
 forcer les contredisans à se contenter de
 cela, par cette raison, assauoir, Que l'ombre
 & le corps, la figure & la vérité, sont
 choses opposees : Si donc le Christ a la
 vérité de l'éternité, Melchisedech ne l'a
 sinon en ombre & apparence : car Melchisedech
 ne feroit pas figure, s'il auoit
 la vérité. Et c'est ce que n'ont pas compris
 tous ceux qui se sont traouillés à
 trouuer vne véritable éternité de Melchisedech.

[Page 26]

Et quoy? ne voyons-nous pas au chapitre
 II. de cette Epistre , que l'Apostre
 attribue à Isaac vne espece de resurrection,
 consistant en ce que le glaiue dont
 il deuoit estre frappé , ayant esté en vn
 instant arrêté, il fut comme tout soudainement
 retiré de la mort & ressuscité, &
 que par cette resurrection il a esté figure
 de Christ, ainsi que par son immolation?
 Or cela n'estoit qu'une petite semblance
 de resurrection ; Donc aussi vne petite
 semblance d'éternité peut suffire en
 Melchisedech. En nostre Baptesme nous
 sommes faits vne mesme plante avec
 Iesus Christ , à la conformité de sa
 mort & de sa resurrection , & cela
 [quant à l'exterieur] pour vne petite
 & legere apparence, bien esloignée
 de la chose ; assauoir en ce que l'eau est
 mise sur nostre teste en signe de mort, &
 en est ostée en vn instant en signe de vie.
 Et tous les Sacremens (or les Sacremens
 sont d'entre les figures les plus expresses)
 n'ont qu'une legere conuenance &
 similitude à ce dont ils sont Sacremens.
 Et neantmoins pour vn peu de conuenance
 ils portent le nom de ce dont ils sont

[Page 27]

sont Sacremens, comme s'ils en auoyent la verité mesme. De mesme, pour vne petite apparence, la condition de Melchisedech est proposee comme vne eternité. Voire quand { } Dieu a voulu donner des images de sa perfection en la Nature, il a donné des choses qui sous vne apparence de ce qu'il est, ont en effect le contraire : Pour exemple, le Soleil est dans vn mouuement continuel, & neantmoins vous diriez qu'il ne se bouge : C'est l'image de l'immobilité de Dieu dans son actiueté infinie. Le Soleil donc, bien qu'il n'ait point en effect l'immobilité, mais seulement vne apparence, est l'image de laquelle Dieu agit sans se mouuoir. Pourquoi donc de mesme, en l'Escriture, ne nous contenterons-nous de quelque legere apparence pour représenter l'eternité du Mediateur?

Or cela posé que l'eternité de Melchisedech ne deust point estre reelle, mais typique & figuratiue, c'est à dire, vne apparence seulement d'eternité : le di que l'eternité n'a peu estre mieux figuree & ombragee que par vn estre dont

[Page 28]

le commencement & la fin, encor qu'ils fussent, ne paroistroyent point en vn sujet auquel ces choses paroissent le plus, & auquel elles sont ordinairement remarquees & recitees entre les hommes. Or tels estoyent iadis les Rois, & les Sacrificateurs en Israël : Car les Rois & Princes sont de tous les hommes ceux qu'on connoist le plus par leur extraction, & leur mort : & dont les Historiens ne se taisent pas, comme des autres hommes, dont la condition n'est pas de telle importance. On garde avec soin les genealogies des Princes ; On décrit & leur extraction & leur mort. Et quant aux Sacrificateurs entre le peuple de Dieu, estoit tenu registre tres-exact de leur genealogie : pource qu'on n'entroit en cette dignité qu'à raison de l'extraction : dont vous lisez Nohemie 7. qu'apres le retour de la captiuité, les enfans d'Habaja, de Kotz & de Berzilai, furent deboutés de la sacrificature, pource qu'ils ne peurent monstres és registres leur genealogie. Et quant à la mort, la sacrificature Leuitique n'estant continuee que par la succession cession

[Page 29]

d'vn Sacrificateur à l'autre par mort, il falloit que la mort aussi bien que la naissance des Sacrificateurs fust connuë. Mais voicy vn Roy & vn Sacrificateur que l'Escriture propose au 14. du Genese, en vne action tres-importante, sans nous rien proposer de son origine & extraction, ni de sa fin. & sans

nous rien dire de luy que ce qui se passa entre Abraham & luy : comme si cet homme-là estoit venu du ciel pour cette action-là, & estoit à l'instant disparu. Si donc les choses sont dites n'estre point selon qu'elles ne paroissent point, là où elles sembloient deuoir paroistre: la genealogie de Melchisedech, sa naissance & sa mort, par ce silence sont comme n'estans point; veu notamment qu'il s'agit icy des Escritures, desquelles telle est l'autorité & l'excellence, en faict de Religion, qu'on pretend les choses estre où n'estre point, selon qu'elles en parlent, ou s'en taisent. Si l'Escriture n'a pas dit vne chose, nostre Apostre a de coustume de n'en faire autre estat que de ce qui n'est point. C'est son argument en cette Epistre, chap. 1.

Auquel

[Page 30]

des Anges, dit-il, Dieu a-il onques dit, Tu es mon Fils, ie t'ay aujourd'huy engendré

?

'Auquel des Anges a-il onques dit, Sieds toy à ma dextre iusqu'à tant, &c'. Car ces paroles se reduisent à cet argument. En matiere de Religion, ce que l'Escriture ne dit point, n'est point. Or Dieu ne dit, en nulle part de l'Escriture, à aucun des Anges, Tu es mon fils, ie t'ay aujourd'hui engendré, ni sieds toy à ma dextre. Donc aussi cela n'est point, assauoir qu'aucun des Anges ait l'honneur d'estre le Fils que Dieu ait engendré, ou d'estre esleue à la dextre de Dieu. Et quant à ce que l'Apostre dit en ce chapitre touchant Melchisedech, qu'il est tesmoigné de luy qu'il est viuant. Il y a deux sortes de tesmoignage, l'un affirmatif, quand on exprime formellement la chose : & l'autre negatif, quand on donne à entendre qu'elle est, ou qu'elle n'est pas, par le silence : Et ainsi est-il tesmoigné au liure de Genese, que Melchisedech est viuant, d'un tesmoignage negatif, entant que l'histoire du liure de Genese n'a rien dit de sa mort.

Or voyez icy la bonté & sagesse admirable rable

[Page 31]

de Dieu. Il a voulu que nous eussions des ombres & figures de son Christ en toutes choses. Il a voulu nous en donner de sa Sacrificature en Aaron; de sa Royauté en Daud, & Salomon, & en tous les Rois d'Israël : de sa charge de Prophete, en tous les Prophetes : dont vous oyez Isaye dire, comme figure de Christ, Me voicy & les enfans que tu m'a donnés. Mais Dieu a voulu passer plus outre, & nous donner des figures du Christ, non seulement au regard de ses charges, mais aussi des accidens, dispositions, & qualités de ses charges. Pour exemple, quant au regne, il a voulu donner des ombres de sa sapience &

de ses richesses celestes, & de sa paix, en la Sapience de Salomon, és richesses & en la paix de son regne. Quant à l'autorité de sa charge de Prophete, il a donné Moyse, lequel il falloit escouter comme Dieu mesme. Donques il falloit, afin que rien ne nous manquast, que mesmes l'eternité du Christ nous fust figuree. Et pourtant la sagesse de Dieu a trouué à propos de mettre en auant és Escritures ce Melchisedech. Et si vous

[Page 32]

objectez encor, que cette ombre est bien petite, & a peu de corps. Le respon qu'il y en a plusieurs, lesquelles vous reconnoissez, qui n'en ont pas plus. Pour exemple, La sagesse de Salomon qui a esté fletrie des actes de grande folie, & neantmoins a serui d'ombre à la sagesse du Fils de Dieu : La paix du Royaume de Salomon, qui fut bien-tost troublée, & neantmoins est proposee comme figure de la paix du regne de Iesus Christ laquelle demeure à iamais : Les sacrifices de la loy estoient appelés propitiatoires, & neantmoins en effect ils ne l'estoyent point, (car il est impossible que le sang des taureaux & des boucs, oste les pechés) & seulement nettoyoient les souillés, quant à la chair, c'est à dire, n'auoyent qu'un nettoiyement ceremoniel & legal. Quoy? mesmes le monde par sa rondeur, en laquelle on ne voit ni commencement ni fin, est vne image & symbole de l'eternité de son Autheur, & neantmoins il a commencé & prendra fin. Et la duree du regne de Salomon, qui a pris fin avec lui, est bien proposee comme figure de l'eternité

[Page 33]

l'eternité du regne de Iesus Christ. Ainsi donc, en faict de type & de figure, pour la perpetuité de la sacrificature, l'obmission de la naissance & genealogie & de la mort, suffisoit pour figurer vne eternité. & vn estre par lequel Iesus Christ seroit sans pere, sans mere, &c.

Or maintenant, quant à Iesus Christ, vous entendez assez comment il est sans pere, sans mere, &c. Assauoir sans Pere, quant à sa nature humaine: sans mere, quant à sa nature Diuine : sans genealogie, & sans commencement, & fin de iours, quant à la Diuinité : Si ce n'est qu'au regard d'estre sans fin de iours, vous consideriez aussi que depuis que Iesus Christ a esté ressuscité des morts, il ne peut plus mourir, s'estant acquis vne vie celeste & spirituelle & glorieuse, sur laquelle la mort n'a plus de domination.

Mais l'heure ne nous permettant pas d'entrer és autres poincts, de la conuenance de Christ & de Melchisedech, Contentons-nous de rapporter cettui-

cy au but de l'Apostre. Et voyons ce qui resulte de ce que Christ, en tant que
[Page 34]

Sacrificateur, est sans commencement de vie & sans fin de iours. Premierement, de ce qu'il est sans commencement de vie, nous apprenons qu'il est vray Dieu, & par consequent le vray Mediateur, qui d'une vertu infinie nous sauue de la mort en laquelle nous estiōs. Car estre eternel, comme n'ayant aucun commencement, & estre Dieu, est mesme chose. Car estre sans commencement, est estre par soy-mesme. Or estre par soy-mesme, est estre Dieu. C'est pourquoy il est dit Esaie 9.

L'enfant

nous est né, le Fils nous est donné, on l'appelera le Dieu fort & puissant, le Prince de paix, le Pere d'eternité

Secondement, nous apprenons qu'il s'est présenté de toute eternité à Dieu son Pere, comme nostre Mediateur: tellement qu'encor qu'en certain temps seulement il soit venu se presenter en sacrifice, ayant reuestu nostre nature, neantmoins de toute eternité Dieu nous a regardés en lui, pour nous preparer ses biens & sa gloire. [Qu']est-ce que dit S. Paul Ephesiens 1. 'Dieu nous a esleus en luy auant la fondation du monde'. Et nostre stre
[Page 35]

Apostre Hebr. 13. 'Christ est le mesme hier & aujourd'huy & eternellement'. Ne demandez pas donc comment les fideles qui ont esté auant la venue de Iesus Christ, ont peu obtenir remission de leurs pechés, puis que Christ de toute eternité comparoissoit deuant Dieu comme pleige des pecheurs repentans.

En troisième lieu, de ce que Christ est Sacrificateur sans fin de iours à la façon de Melchisedech, il s'ensuit qu'il n'y a aucun qui luy succede: Et partant establir sous le Nouveau Testament Sacrificateurs selon l'ordre de Melchisedech, qui se succedent l'un à l'autre par mort, (comme l'Eglise Romaine en establit) est combattre la verité de cette figure. Car cette eternité du Christ figuree en Melchisedech est proprement pour estre opposee aux Sacrificateurs Leuitiques, ausquels on succedoit. Aussi quand l'Apostre dit en ce chapitre, que Iesus Christ a une sacrificature perpetuelle, le mot de perpetuelle en la langue de l'Apostre, signifie qui ne passe point à un autre.

[Page 36]

Ainsi nous faut-il remarquer que nostre texte renuerse le fondement que nos Aduersaires prennent de leur Sacrifice de la Messe, lequel ils disent estre le Sacrifice de l'ordre de Melchisedech,

entant que Melchisedech
offrit à Dieu Sacrifice de pain & de vin.
Car n'est-ce pas chose estrange qu'ils
posent vne chose, de laquelle, ny Moïse,
ny l'Apostre n'a dit vn seul mot ! Non
Moïse, duquel voicy les mots , 'Melchisedech auſi Roy de Salem apporta pain & vin : Et il estoit Sacrificateur
du Dieu Souuerain, & benit Abraham' . Or ce fut à
Abraham & à ses gens qu'il offrit cela,
& non à Dieu. Et ce present de pain &
de vin, concernoit la liberalité Royale
de Melchisedech enuers des gens , qui
estans lassés du combat, auoyent besoin
de rafraichissement. Et est à remarquer
que le mot de pain en l'Ecriture se
prend en general pour viures & viandes:
Et que le mot d'offrir n'y est point: mais
le mot d'apporter , mettre en auant , tirer ,
faire tirer hors : car c'est le mot que l'Ecriture
employe , quand elle dit que
Dieu tira son peuple hors d'Egypte : comme mesmes

[Page 37]

mesmes la version Canonique de l'Eglise
Romaine n'a pas le mot d'offrir,
mais le mot d'apporter & mettre en auant.
Et quant à ce que la qualité de Sacrificateur
est donnée à Melchisedech, c'est
pour rendre la raison pour laquelle il ait
eu autorité de benir Abraham , & de
receuoir de luy la disme. Mais l'erreur
est venu que la Version Vulgaire a fourré
vn mot de Car, là où l'Hebreu n'auoit que
le mot de Et : Et qu'au lieu de traduire
simplement selon l'Hebreu , 'Et il estoit Sacrificateur du Dieu Souuerain', elle a mis,
'Car il estoit Sacrificateur du Dieu Souuerain' :
ce qui fait imaginer que Moïse
rendoit raison de l'action de Melchisedech
apportant pain & vin: & que pourtant
il y auoit eu en cela vn sacrifice. Au
lieu que si on eust gardé le mot, Et, on
eust peu rapporter cela à la suite , assauoir
à ce que Melchisedech benit Abraham,
& receut la disme. Et ce que nous
disons est si euidant , que voicy la confession
qu'en fait le Cardinal Cajetan
en ses commentaires sur ce lieu :

Il n'est rien escrit icy, dit-il, touchant un sacrifice ou une oblation, mais touchant une action

[Page 38]

de mettre en auant ou tirer hors , laquelle , Ioseph dit auoir esté faite pour rafraischir les victorieux. Car quant à ce
qu'en l'Edition Vulgaire , il est adjousté comme pour cause d'oblation ; Car il estoit Sacrificateur du Dieu Souuerain, il
n'est pas en l'Hebreu comme cause , mais comme une clause separee

assauoir, & il estoit Sacrificateur au
Dieu Souuerain, entant que Moïse joint à la dignité & liberalité Royale la dignité Sacerdotale.
Or si Moïse n'a rien dit touchant
aucun sacrifice de Melchisedech,
S. Paul n'en a non plus parlé. Car voicy
ses paroles , 'Melchisedech estoit Roy de Salem, Sacrificateur du Dieu Souuerain, lequel vint au deuant d'Abraham
comme il reuenoit de la deffaitte des Rois, & le benit: auquel Abraham departit la disme de tout'.
Sur quoi donc, Docteurs de l'Eglise Romaine,
auez-vous basti ce sacrifice que
vous pretendez offrir pour les pechés
des viuans & des morts, sous les especes
du pain & du vin de l'Eucharistie? Auez
vous leu l'Ecriture pour la suiure , ou

pour inuenter ce qu'elle ne disoit point?
Car mesme l'Apostre a passé par dessus
l'action de Melchisedech apportant pain

[Page 39]

pain & vin : Il n'a pas voulu la rapporter
au nombre des conuenances qui sont
entre Christ & Melchisedech:& n'a pas
dit vn mot de pain & de vin. Pourquoi
cela?L'Esprit de Dieu qui le conduisoit,
l'a ainsi dispensé,pour ne donner occasion
à l'erreur qu'il preuoyoit. Car bien
que nous ne nions pas , qu'il n'y ait
quelque conuenance entre Christ &
Melchisedech en cecy , assauoir, que
comme Melchisedech sustenta de pain
& de vin Abraham & ses gens fatigués
du combat qu'ils auoyent eu contre
leurs ennemis : Ainsi Iesus Christ nous
sustente icy bas au combat que nous
auons contre Satan & le monde par le
Sacrement du pain & du vin en la sainte
Cene,nous nourrissant spirituellement
de son Corps & de son Sang : Neantmoins
l'Apostre n'allegue point cette
conuenance. D'où s'ensuit qu'elle ne
pouuoit estre prise pour fondement
d'vn culte & sacrifice en l'Eglise Chrestienne:
Outre qu'il n'y a nulle consequence
de la nourriture que Iesus Christ
nous donne par le Sacrement de son
Corps & de son Sang, à vn sacrifice reel

[Page 40]

qui s'y face de son Corps & de son Sang
sous des apparèces de pain et de vin.Car
ce que nous sommes sustentés du Corps
& du Sang de Christ , est que ce corps
& ce sang ayant esté vne fois offerts en
sacrifice en la Croix,nos ames en reçoient
consolation & sanctification : assauoir
quand nous ramenteuons par vraye
foy ce que Iesus Christ a fait pour nous
en la Croix, selon qu'il dit , 'faites cecy en memoire de moy', & l'Apostre, 'toutesfois & quantes que vous mangerez
de ce pain & boirez de cette coupe , vous annoncerez la mort du Seigneur , iusqu'à ce qu'il vienne'.

Pour finir ce propos, mes freres, faisons
encor sur nostre texte quelque obseruation
pour nostre instruction & consolation.
C'est que si nous auons vn Sacrificateur
eternel: comme il surmonte
tous les Siecles, aussi il n'y a peché si
grand qu'il ne surmonte:car Iesus Christ
ne peut estre Sacrificateur eternel en
duree, qu'il ne soit infini en vertu. Partant
recourez,pecheurs , à ce Sacrificateur,
lequel quand vos pechés seroyent
rouges comme cramoisi , les blanchira
comme la neige, si vous vous adressez à luy

[Page 41]

luy par { } repentance & foy.

Et puis qu'il est sans fin Sacrificateur,
intercedant pour nous à la dextre de
Dieu, receuez, fideles, la consolation
que vous donne S.Iean, disant, Bien-aimés
si nous auons peché,nous auons vn
Aduocat enuers le Pere, Iesus Christ le

iuste , qui est la propitiation pour nos pechés. Nos infirmités estans grandes, & les tentations violentes, si Iesus Christ apres nous auoir reconciliés à Dieu, nous eust abandonnés, nous luy eussions aisément esté ravis. Mais intercedant continuellement pour nous , nous sommes releués de nos cheutes, & soustenus contre les tentations , & rendus plus que vainqueurs en toutes choses. De sorte que son intercession nous assure de nostre perseuerance en son salut.

Mais aussi si sa Sacrificature n'a point de fin , s'ensuit-il pas de là que nous ne devons point mettre de fin à nostre amendement & sanctification , qui est le sacrifice , auquel il nous faut vaquer, en crucifiant la chair avec ses conuoitises. O homme, Iesus Christ t'a consacré pour tousiours, par l'eternité de son

[Page 42]

sacrifice : Pourquoi donc maintenant t'abandonnes-tu au peché? Pourquoi cesses-tu ce qui doit estre perpetuel, assauoir le sacrifice du renoncement à toy-mesmes? Le Dieu souuerain auroit-il fait son Christ Sacrificateur à tousiours, afin que ta sanctification ne fust que de quelques heures , & de quelques iours? Offrons donc continuellement nos corps en sacrifice viuant, saint, plaisant à Dieu, qui est nostre raisonnable seruice: Offrons sacrifice de louange à tousiours à Dieu, confessans son Nom.

Et s'il faut vous monstrier plus amplement l'analogie & conuenance qu'il y a de nous à Christ. Christ est sans pere & sans mere ; & toy Chrestien as vne naissance spirituelle , en laquelle tu n'as ny pere ny mere charnels. Car S. Iean dit-il pas, que ceux qui ont creu en Iesus Christ ne sont point nés de sang, ny de la volonté de la chair ny de la volonté de l'homme , mais sont nés de Dieu? Iesus Christ estoit Roy & Sacrificateur. Et S. Iean dit-il pas Apocalypse 1. que Iesus Christ

nous a fait Rois & Sacrificateurs
à Dieu son Pere

? Et si Melchisedech apporta porta

[Page 43]

pain & vin pour en sustenter Abraham & ses gens , sont-ce pas les œuvres de charité par lesquelles vous devez donner à manger & boire à celui qui a faim & soif, & subuenir aux nécessités de vos prochains? Ce sont icy, ce sont icy ces sacrifices auxquels l'Escriture vous exhorte de vaquer: 'Ne mettez point en oubly, dit l'Apostre en cette Epistre, la beneficence & communication ; car Dieu prend plaisir à tels sacrifices'. Melchisedech alla au deuant d'Abraham , allez au deuant du pauvre & de l'affligé. et si l'Apostre nous a dit, que Melchisedech vint au deuant d'Abraham, quand il retournoit

de la deffaitte des Rois : sçachez
aussi, mes freres , que quand nous vaquerons
à la deffaitte du peché en nos
membres, & au combat contre nos
conuoitises charnelles , & que nous aurons
vaincu le peché & le monde , ce grand
Melchisedech viendra à nous , avec le
pain & le vin de ses consolations celestes,
il rassasiera nostre ame des biens de
son Paradis, & nous donnera sa benediction
eternelle: Ainsi soit il.